



Aningaasaqarnermut Nunamullu Namminermut  
Naalakkersuisoq

Ulloq: 28-05-2021  
J.nr.: 01.31.06/21-00933

## Aningaasaqarnermut Akileraartarnermullu Ataatsimiititaliap tallimangornermi ulloq 28. maj 2021-mi aalajangiineranik Naalakkersuisunut ilisimatitsineq

Namminersorlutik Oqartussat kommunillu innuttaasunut Karrat Kangerluanni il.il. qaqqap sisoornissaanut tassaarsuaqarnissanullu aarlerinartorsiorfinniittunut immikkut ittumik ikiorsiinissap ingerlanneqarnissaanut piginnaatitsinissaq pillugu ilassutitut aningaasaliivigineqarnissamut qinnuteqaat. **(TUAVIORTOQ)**

” Naalakkersuisut **inassutigaaat**,

- Konto pingaarneq nutaaq 20.10.35 Innuttaasunut Uummannap eqqaani il.il. pingortitami ajunaarnersuaqarnissamut aarlerinartorsiorfiup iluaniittunut immikkut ittumik ikiorsiissutit, 0 kr.-nik aningaasartalerlugu ilanngussamilu oqaasertaliussat nr. 1-5 naapertorlugit 2021-mut ilassutitut aningasaliissutitut inatsimmut ilanngunneqassasoq.
- Aningaasaqarnermut Akileraartarnermullu Ataatsimiititaliap suliap nukingiullugu suliarinissaanut qinnuigineqassasoq”.

### Aningaasaqarnermut Ataatsimiititaliap oqaaseqaatai

Naalakkersuisut inassuteqaataat Aningaasaqarnermut Ataatsimiititaliamit ullumi tuaviortumik suliarineqarput. Inassuteqaatinut ilaapput oqaasertaliussat 5-it (suliap allaaserineqarneranit issuakkat):


**”Konto pingaarneq 20.10.35 Innuttaasunut Uummannap eqqaani il.il. pingortitami ajunaarnersuaqarnissamut aarlerinartorsiorfiup iluaniittunut immikkut ittumik ikiorsiissutit.**

#### **Nr. 1.**

*Innuttaasut Karrat Kangerluanni qaqqap sisoornissaanut tassaarsuaqarnissanullu aarlerinartorsiornermik eqqorneqartut nuttarnerulersitsiniarluni ikiorsiissutinik, pigisallu nuunneqarnissaannut tapiissutinik Naalakkersuisut tunniussisinnaanerannik pisinnaatinneqarput.*

*Ikiorsiissutit il.il. innuttaasunut ulloq 11. maj 2021 Niaqornani, Ukkusissani, Ikerasammi, Saattuni, Qaarsuni Uummannamilu najugaqartutut inuit allattorsimaffianni nalunaarsorsimasunut atuupput. Ikiorsiissutinut aamma meeqqat 18-t inorlugit ukiullit angerlarsimaffimmiittut ilaatinneqarput, taakku ulloq 11. maj 2021 inoqarfinni pineqartuni inuit allattorsimaffianni najugaqartutut nalunaarsorsimanerat apeqqutaatinnagu.*

*Uummannamut tunngatillugu ullormi siuliani taaneqartumi taamaallaat innuttaasunut nunap assingani ataaniittumi inissimasuni, malissuarnilluunniit anguneqarsinnaasuniit anguneqarsinnaanngitsuniluunniit ineqartunut atuuppoq:*



*Ikiorssiisutit Namminersornerullutik Oqartussat nuttarnersitsiniarluni ikiorssiisutit pillugit nalunaarutaanni maleruagassat naapertorlugit tunniunneqassapput, tassanilu nalunaarummi § 3 aamma § 6 atuutsinneqassanngillat, kiisalu nalimmassaatiit tapiissutit innuttaasunut piffinnit taaneqartunit nuunnissamik kissaateqartunut tunniunneqartussaannerat pillugu.*

*Innuttaasut oqaasertaliussat uku malitsigisaannik nuttarnersitsiniarluni ikiorssiisutinik, kiisalu pigisat nuunneqarnerannut tapiissutinik tunineqartut, Namminersorlutik Oqartussani kommuniniluunniit inissianut attartortakkanut inoqanngitsunut innersuussinermut tunngatillugu, inissianik attartortitsisarneq pillugu Inatsisartut peqqussutaanni § 5, imm. 1, nr. 6-imut attuumatinneqassapput.*

*Innuttaasut oqaasertaliussat uku malitsigisaannik nuttarnersitsiniarluni ikiorssiisutinik, kiisalu pigisat nuunneqarnerannut tapiissutinik tunineqartut meeraat, Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuut nr. 16, 3. december 2012-meersumi § 9, imm. 1-imi ataatsimoortunut a-mut ilaatinneqassapput.*

*Innuttaasut oqaasertaliussat uku malitsigisaannik nuttarnersitsiniarluni ikiorssiisutinik, kiisalu pigisat nuunneqarnerannut tapiissutinik tunineqartut utoqqaat illuini inissinneqarnissamut salliutinneqarnissaannik kommunit pisinnaatinneqarput.*

*Inissianik attartortitsineq pillugu peqqussummi § 22 naapertorlugu kommunit inunnut oqaasertaliussanut ilaatinneqartunut aningaasartuutigiumaagaannik Naalakkersuisut utertitsinissamik pisinnaatinneqarput.*

**Nr. 2.**

*Karrat Kangerluanni innuttaasunut qaqqap sisoornissaanut tassaarsuaqarnissaanullu iluaqutsiisussanik ajornartorsiornermi ikiorsiissutinik tigusinissamut atuinissamullu Naalakkersuisut pisinnaatinneqarput.*

**Nr. 3.**

*Niaqornani, Ukkusissani, Ikerasammi, Saattuni, Qaarsuni Uummannamilu inigisat akeqanngitsumik Namminersorlutik Oqartussanut tunniunneqarneranni Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq, peqqussutilluunniit siusinersumeersut naapertorlugit taarsigassarsianik appartitsisinnaanermut isumakkeerinnissinnaanermulluunniit pisinnaatinneqarput.*

*Taamaattoq Uummannamut tunngatillugu inissianut oqaasertaliussaq nr. 1-imi malissuit angusinnaasaannut angusinnaanngisaanulluunniit taamaallaat atuuppoq.*

*Inissianik tiguneqartunik isaterinissamut aningaasartuuteqarnissamut Naalakkersuisut pisinnaatinneqarput.*

**Nr. 4.**

*Avannaata Kommuniata Illunut sanaqataaffiusunut taarsigassarsiat pillugit Inatsisartut inatsisaat nr. 28, 3. december 2018-imeersoq naapertorlugu inissianik utertillugit tigusaanik Naalakkersuisut akeqanngitsumik tigusisinnaanermik pisinnaatinneqarput.*

*Taamattaaq inissianik tiguneqartunik isaterinissamut aningaasartuuteqarnissamut Naalakkersuisut pisinnaatinneqarput.*

**Nr. 5.**

*Naalakkersuisut illunut tallimanut atortussiassanik, Qaarsuni sanaartorneqartussat pitsaaqataannik assinganillu inniminniinissamik taakkulu sanaartorneqarnissaannut isumaqatigiissuteqarnissamut pisinnaatinneqarput. Taamattaaq Qaarsuni mittarfiup orsussamut sillimmammik tankianik sanaartornissamut atatillugu inniminniinissamik Naalakkersuisut pisinnaatinneqarput.*

*Aningaasartuutissanut missingersuummik saqqummiussisoqarpat, Naalakkersuisut suliniutinik suliniutinut aningaasaliissutinut ilanngussinissamut pisinnaatinneqarput.”*

Oqaasertaliussarlu taanna pisiffigisassamit killiliussatut piffissaliisimaneq pissutigalugu tuaviortumik suliarineqassasoq qinnutigineqarpoq. Killiliussatut piffissaliunneqarpoq 28. maj.

Akuersinerminut atatillugu ataatsimiititaliaq arlalinnik apeqqtissaqarpoq. Tuaviortumik suliarinninnissap qinnutigineqarnera pissutigalugu taakku suliaq pillugu aalajangiinermi ilanngunneqanngillat, piffissamili qaninnermi nassiunneqarumaarlutik.

Tamatuma saniatigut suliap ingerlaqqinnerani akuutinneqarnissaq kiisalu konto pingaarnermik 20.10.35-imik atuneq pillugu ingerlaavartumik ilisimatinneqartarnissaq ataatsimiititaliamit naatsorsuutigineqarpoq.

### **Aningaasaqarnermut Ataatsimiititaliap aalajangiinera**

Siuliani allassimasutut oqaaseqaateqarluni Naalakkersuisut inassuteqaataat kiisalu oqaasertaliussat siuliani allassimasutut iluseqartut Aningaasaqarnermut Ataatsimiititaliamit akuerineqarput.

Ataatsimiititaliaq sinnerlugu

Paneeraq Olsen



Aningaasaqarnermut Akileraartarnermullu Ataatsimiititaliap siulittaasua